




册府元龟
卷之三十三
至五



13
849
14



門 4 3
849
14



冊府元龜

甲巡按福建監察御史臣李嗣京 訂正

知閩縣事 臣曹鼎臣 參閱

知建陽縣事 臣黃國琦 較釋

帝王部 三十三

崇祭祀第二

後周閔帝元年正月辛丑即天王位柴燎告天壬寅
祠圓丘詔曰予本自神農其於二丘宜作厥主始祖
獻侯啓土遼海肇有中國其配南郊文考德符五運
受天明命祖於明堂以配上帝廟為太祖癸卯祠方

冊府元龜 帝王部 卷之三十三

丘甲辰祠太宰辛亥祠南郊二月癸酉朝日子東郊
戊寅祠太社

八月戊辰祠太社

明帝元年十月乙酉祠圓丘丙辰祠方丘甲午祠太
社

十一月丁未祠圓丘

武帝保定元年正月庚戌祠圓丘壬子祠方丘甲寅
祠感帝於南郊乙卯祠太社

二月甲午朝日於東郊

太和元年三月丙午祠南郊

二年三月初立郊丘壇壝制度

三年正月辛丑祠南郊

建德二年正月辛丑祠南郊

六年五月己丑祠方丘

宣帝宣政元年六月卽位七月丙午祠圓丘戊申祠
方丘

八月丙寅夕月于西郊

隋高祖開皇元年二月甲子卽位設壇於南郊天使
柴燎告天丙寅詔修社廟

三年四月癸巳親雩

五月辛酉有事於方澤

八月戊子有事於大社

四年正月辛未有事於南郊

七年二月丁巳朝日於東郊

十年十一月辛丑有事於南郊

十二年十一月辛亥有事於南郊

十四年閏十月詔東鎮沂山南鎮會稽山北鎮醫無

閭山冀州鎮霍山竝就山立祠東海於會稽縣界南

海於南海鎮南竝近海立祠及四瀆吳山竝取側近

巫一人主知灑掃竝命多時松栢其霍山雩祠日遣

使就焉

甲戌年正月詔北鎮於冀州龍山立祠東鎮晉州霍山鎮若修造竝准西鎮吳山造神像

十五年正月東巡狩次齊州丙寅旅玉符山

三月巳未至自東巡狩望祭五嶽海瀆

六月辛丑詔名山大川未在祀典者悉祭之

十八年十一月癸未有事於南郊

仁壽元年十一月巳丑有事於南郊

煬帝大業元年孟春祀感帝孟冬祀神州改以高祖

文帝配其餘竝用舊禮

四年八月辛酉親祀恒嶽河北道郡守畢集

十一年十一月乙巳有事於南郊

唐高祖武德元年五月甲子卽位遣兼太尉禮部尚書蕭造于南郊

二年十月幸華陰甲子親祀華山

三年四月親祠華山

四年十一月甲子有事於南郊

七年六月幸仁智宮以少牢祭宮所山川

九年正月丙子詔曰厚地載物社主其祭嘉穀養民稷惟元祀列聖垂範昔王通訓建邦正位莫此爲先爰暨都邑建于州里率土之濱咸極莊敬所以勸農務本修始報功敦序教義整密風俗末代澆浮祀典

虧替時逢喪亂仁惠弛薄壇壝闕昭備之禮鄉閭無紀合之訓朕握圖受曆菲食卑宮奉珪璧以尊嚴潔粢盛而禋燎尙想躬稼厲精治本永言享祀宜存億紀是以吉日惟戊親祀大社率從百僚以祈九穀今旣南畝淑載東作方興州縣致祀宜盡祇肅四方之民咸勤殖藝隨其性類命爲宗社京邑庶士臺省群官里閭相從共尊社法以時供祀各申祈報兼存宴醕之義用洽鄉黨之歡且立節文明爲典制進退俯仰登降祈旋明加誨厲遞相勸獎齊之以禮有恥且格布告天下卽宜遵用戊寅親祀稷

太宗以武德九年八月甲子卽位遣兼太尉司空裴寂柴燎告天於南郊

貞觀五年十一月丙子帝有事於南郊

十四年十一月甲子朔旦冬至親祠南郊

十七年十月甲寅詔曰朕聞上靈之應疾於影響茂社之興積於年代朕嗣膺寶曆君臨區宇憑宗社之介福賴文武之同心時無風塵之警野有京坻之積厚地降祉貞石表祥營翠色而流光發素質而成字前紀厥初之德次陳卜年之永後述儲貳之美竝名字昭然楷則相次曠代之所未聞故老之所未覩猥

以寡德處奉成命緬惟往載良增兢惕自天之佑豈惟一人無疆之福方覃九土自非大報泰壇稽首上帝則靡申奉天之志寧副臨下之心今年冬至有事南郊所司率繇舊典十一月己卯有事於南郊太宗升壇皇太子從奠於時累日陰雪是旦猶雲霧晦冥及太宗升壇煙氛四散風景清朗文物昭映禮畢祝官讀謝天瑞文曰嗣天子臣諱敢昭告于昊天上帝諱纂承鴻基君臨宇縣夙興旰食無忘於政道導德齊禮良愧于前聖爰有成命表瑞貞石文字昭然曆數惟永旣旌高廟之業又錫眇身之祚逮于皇太子

某亦降禳符竝具紀姓氏兼列名字仰瞻雲漢寔銘
大造俯惟寡薄彌增寅懼敢因大禮重薦玉帛上謝
明靈之貺以申祇慄之誠皇太子某亦恭至泰壇虔
拜於蒼昊庶憑眷祐之德永膺無疆之休

初十六年
太宗遣刻

受命玄玉璽白玉爲螭首其文云皇天景命有德
者昌竝神筆隸書然後鐫勒是日侍中負之以從

十九年征遼三月丁丑幸定州經北嶽帝自爲文祭
之

高宗永徽三年三月甲子詔升先蠶爲中祀

乾封二年十二月甲午詔曰夫受命承天崇至敬於
明祀膺圖纂籙昭大教於嚴配是以薦鮪鱮於清廟

集振鷺於西雍宣雅頌於太師明肅恭於祖考用能
紀配天之盛業嗣積德之鴻基永播英聲長爲稱首
自周景道喪秦室政乖禮樂淪亡典經殘滅遂使漢
朝博士空說六宗之文晉代鴻儒爭陳七祀之議或
同昊天于五帝或分感帝于五行自此以降迺相祖
述異論紛紛是非莫定朕以寡薄嗣膺丕緒肅承禋
祀明發載懷虔奉宗祧寤寐興感每惟宗廟之重尊
配之儀思革舊章以申誠敬禮曰化人之道莫急於
禮禮有五經莫重於祭祭者非物自外至也自內生
於心也是以惟賢者乃能盡祭之義况祖功宗德道

冠百王盡聖窮神義高千古自今已後祭圓丘方丘明堂感帝神州等祖高祖太武皇帝太宗文皇帝崇配仍總祭昊天上帝及五天帝於明堂庶因心致敬獲展虔誠宗祀配天永光鴻烈

上元三年二月詔以今冬有事於嵩嶽命所司修撰儀注務從典故閏三月詔以吐蕃犯塞停嵩嶽封禪之禮

永淳二年春正月甲午朔車駕發東都庚子至奉天宮遣使祭嵩嶽及少室箕山具茨等山西王母啓母廟中宗神龍元年五月改先農爲帝社壇西帝稷壇

禮同大社大稷壇不備方色所以異於大社也

九月壬午親祀昊天上帝皇地祇于明堂高祖天皇大帝配

景龍三年十一月乙丑親祀南郊

十二月甲午幸新豐溫湯境內有自古帝王陵致祭睿宗太極元年正月辛巳有事於南郊

五月戊寅有事於北郊

玄宗先天二年八月癸丑封華嶽神爲金天王

開元四年二月甲子命有司以少宰致祭驪山仍禁樵採時大旱應禱而雨報之也

五年正月命右散騎嘗侍褚無量攝黃門監致祭于帝堯祠吏部尚書兼黃門監宋璟致祭于帝舜祠紫微侍郎同紫微黃門平章事蘇頲致祭于夏禹祠各令當州刺史上佐爲亞獻終獻

十二月戊寅詔曰國之大事在祀神之所歆惟敬潔誠而齊精意以享則可臻介福致休祥深慮有司未副厥旨所緣宗廟社稷嶽瀆等祭宜令禮官博士斟酌古今務加虔肅合於典禮卽詳定奏聞

八年三月勅頃歲未登水旱不節今春事方起農桑是憂祈於上玄福茲下土式展郊禋之禮以申誠請

之心宜令左嘗侍元行冲攝侍中祠南郊太嘗長官分祭華嶽溫湯

十年十二月壬寅將北巡詔曰王者承事天地以爲主郊享奉尊以通神蓋燔柴大壇定天位也瘞埋太圻就陰位也將以昭報靈祇克崇嚴配爰迨秦漢稽諸祀典立甘泉於雍時祠后土於汾陰遺廟巋然靈光可燭朕觀風唐晉秩望山川肅恭明神思致禋敬爲人求福以輔升平合此神符應於嘉德宜以來年正月北巡狩行幸至汾陰以二月祠后土所司准式

先是雕上有后土祠嘗爲婦人素像則天時移河西梁山神素就祠中配焉至是有司送梁山神像於祠

外之別室內出錦繡衣服以上后土之神乃更加裝飾焉又於祠堂院外設壇如皇地祇之制及所司起作獲寶鼎三枚以獻

十一年正月行幸北都二月壬子祠后土於汾陰之
雁上

四月庚申勅曰河東冀方其鎮惟霍神為天吏山有
嶽靈在昔皇業初興肇蒙嘉祉今者省方旋軫重獲
休徵同受三禱之貺獨忘百邑之禮其霍山宜崇飾
祠廟秩視諸侯蠲山下十戶以為灑掃晉州刺史春
秋致祠

九月癸未制曰帝王承天必崇告類之典文武尊祖
是遵嚴訓之義所以克荷成命昭升前烈蓋王者之
子道乃聖人之神教朕以寡昧猥承丕緒獲主祭祀
一紀于茲輔相之宜下不足以被物馨香之德上不
足以動天故歲感不登刑且未恤內省為媿大禮猶
鬱星昝驟遷夙夜祇懼今四夷內附諸侯率職群生
和洽百物阜蕃猶恐教或未孚求之皇極誠有不達
觀於國風故親巡河東祈穀雁上神歆有答歲物以
異此皆先聖無疆之休上玄啓祐之貺冀因報謁式
展誠敬宜以迎日之至允備郊天之禮所司詳擇舊
典以聞十一月戊寅親祠南郊

十二年十一月庚午幸東都勅有司所經名山大川自古帝王陵忠臣烈士墓精意致祭以酒脯時菓用代牲牢丙寅至華州命刺史徐知仁與信安王禕勒石於華嶽祠南之通衢帝親製其文

十三年十一月壬辰詔封太山神爲齊天王禮秩加三公一等宜令所管崇飾祠廟去山十里禁樵採十六年六月丁亥詔曰爰自首春有愆時雨朕憂勤黎獻精禱靈祇遂蒙九玄垂福百神效祉膏澤頻降嘉生繁育瞻彼山川能興雲雨報功享德祀典存焉諸州所管各山大川宜令當處長官設祭務盡誠敬

以昭典禮庚寅詔曰宗社垂祐陰陽順成甘澤應時庶物繁育祇奉靈慶寅良載深宜令中書門下肅事昭報仍令所司擇日奏聞

十八年正月丁巳親迎氣於東郊禮畢詔其海內五嶽四瀆及諸鎮名山大川及靈跡各令郡縣逐處設祭

八月丁酉詔曰祭主於敬神歆惟德黍稷非馨蘋藻可薦宣尼闡訓以仁愛爲先句龍業官以生植爲本普天率土崇德報功饗祀惟殷封割滋廣非所以全惠養之道叶靈祇之心其春秋二祀及釋奠天下諸

州府縣等並停牲牢唯用酒脯務在修潔足展誠敬自今已後以爲嘗式

十九年四月壬辰兩京及天下諸州各置太公廟一所制曰乾坤冲用陰陽所以運行帝王大業文武所以垂範故四序在乎平分五材資於並用式稽乾坤之意載明文武之道永言舊章斯典未洽自我而始爰備闕文昔羲皇立弧矢之象黃帝有甲兵之事將以定禍亂濟生靈分二柄而齊設配兩儀而共久至若用之以仁義行之以禮樂龍豹卷舒而莫測星辰應變而無方誰其尸之則齊太公之道也故宣尼大

聖立文以化成尙父惟師仗武而弘訓齊魯之道列親賢之教興鬱爲政源崇我王業遂使金石之奏永播於尊龍之庭蒸嘗之享不行於非熊之室文武並設斯不然矣豈王風云季禮沒於前修將帥是尊慶彰於今日式崇大典垂裕後昆宜令兩京及天下諸州各置太公尙父廟一所以張良配享春秋二時取仲月上戊日祭諸州賓貢武舉人准明經進士行鄉飲酒禮每出師命將辭訖發且便就廟引辭仍簡取自古爲將功業顯著康濟生人者十人准十哲例預享

甲辰命有司祭五嶽四瀆以尚書省諸曹郎分往諸州祭焉

二十年四月戊申命有司擇日就祭五嶽四瀆

十一月庚申祀后土於雒上命有司陳禮帝質明而享是日大赦制五嶽四瀆名山大川各令致祭務盡誠潔

二十二年四月詔曰春秋祈報郡縣嘗禮比不用牲豈云血祭陰祀貴臭神何以歆自今已後州縣祭社特牢宐依嘗式

六月詔曰春來多雨歲事有妨朕自誠祈靈祇降福

以時開霽迄用登成永惟休徵敢忘昭報宐令所司擇日享九廟仍令高品官祭五嶽四瀆其天下名山大川各令所在長官致祭務盡誠潔用申精意二十三年正月乙亥藉田祀先農禮畢詔五嶽四瀆名山大川並令所在長官以禮致祭已卯勅曰自今已後有大祭宐令丞相特進少保少傅尚書賓客御史大夫攝行事

二十四年七月庚子有上封事者言月令云八月日月會于壽星居列宿之長五者土之數以生爲大臣竊以壽者聖人之長也土者皇家之德也陛下首出

壽星之次旅於土德之數示五運開元之期萬壽無疆之應伏請兩京各改一殿以萬壽爲名至千秋節會百僚於此殿如受元之禮每至八月社日配壽星祠至於大社壇享之詔曰德莫大於生成福莫先於壽考苟有所主得無祀之今有上事者言仲秋日月會於壽星以爲朕生於是月欲以配社而祭於義不倫且壽星角亢也旣爲列宿之長復有福壽之名豈惟朕躬獨享其應天下萬姓寧不是懷蓋秦時已有壽星祠亦云舊矣宜令所司特置壽星壇嘗以千秋節日修其祀典申勅壽星壇宜祭老人星及角亢七

宿著之嘗式

二十五年十月戊申勅曰時和年豐神所福也精意備物祭之義也朕每爲蒼生嘗祈稔歲微誠有感丕應乃彰今宗社降靈神祇効祉三時不害百穀用成遂使京坻遍于天下和平之氣旣無遠而不通禋祀之典亦有期而必報宜令兵部尚書兼中書令晉國公李林甫工部尚書同中書門下三品幽國公牛仙客卽分祭郊廟社稷尚書左丞相裴耀卿祭中嶽禮部尚書杜暹祭東嶽御史大夫李適之祭西嶽太子賓客王丘祭北嶽國子祭酒張說祭南嶽其四瀆四

海四鎮及諸名山靈跡等各委所繇州長官祭仍令所司卽擇日開奏務修蠲潔之禮以致精明之德冀申誠懇如朕意焉

二十六年正月丁丑親迎氣於東郊祀青帝

天寶元年正月丁未改元制曰前王重典在乎祭祀况屬惟新事宐昭告五嶽四瀆名山大川諸靈跡及自古帝王忠臣義士竝令所繇州縣致祭

是月甲寅得靈符于尹喜臺西百官請崇徽號壬申詔曰神仙所緘造化同固爰初有待經韞積而多時潛應改元若符契之相合景福修介祗畏良深而羣

官宗室抗疏於外元良諸子屢請於中逮夫緇黃兼彼耆老以至懇誠不已前後相仍願加天寶之名用益開元之號顧惟菲薄曷以當之然則玄貺在乎欽承人心難以稱拒順天從衆義叶至公敬依所請實用多愧斯蓋上玄厚載爰自百神孚佑效靈通於睿祖幽贊惟新之曆克彰永代之祥宐遵祀典式陳昭報可以來月十五日禘玄元皇帝廟十八日享太廟二十日有事於南郊宐令中書門下與禮官等卽詳定禮儀具錄聞奏應緣行事及簡較官等各委有司不須別差人執當其北郊宐差公卿擇日祭五嶽四

瀆及名山大川各令所在長官備禮陳祭務申誠敬
副朕意焉

二月丙戌詔曰凡所祭享必在躬親朕不親祭禮將
有闕其皇地祇宜就南郊乾坤合祭

三月丙申合祭天地於南郊

十月戊寅詔曰社爲九土之尊稷乃五穀之長春祈
秋報祀典是尊而天下郡邑所置社稷等如聞祭事
或不備禮苟崇敬有虧豈靈祇所降欲望和氣豐年
焉可致也朕永惟典故務在潔誠俾官吏盡心庶蒼
生蒙福自今已後應祭官等庶事宜倍加精潔以副

朕意其社壇側近仍禁樵牧至如百姓私社宜與官
社同日致祭

十二月乙亥詔曰歲之豐儉雖繫於嘗數天之感應
實在於精誠頃者按以陰陽求諸推步至於今歲不
合有年朕所以齋心妙門懇其玄德靈徵不遠丕應
乃彰果獲西成頗爲善熟蓋至道儲祉惠於蒸人亦
羣神叶贊錫以昭報詩不云乎無德不報宜令光祿
卿嗣鄭王希言祭東嶽太子詹事嗣許王瓘祭中嶽
太嘗卿韋緇祭北嶽所司郎擇日錄奏其四瀆及諸
名山大川或遠近不同各委所繇郡長官便擇吉日

致祭務崇豐潔以稱朕懷

三載三月戊寅并社稷五星爲大祀詔曰祭之爲典以陳至敬名或不正是相奪倫况社稷孚祐百代蒙其福日月炤臨五星叶其紀兆庶允殖下土式瞻旣超言象之外須極尊嚴之禮列爲中祀頗紊大猷自今已後社稷及日月五星並升爲大祀仍以四時致祭諸星升爲中祀庶昭報之誠格于上下欽崇之稱合于典則

四月丙辰遣使分祀嶽瀆詔曰務農勸穡雖用天道人和歲稔實賴休徵頃者春夏之交稍愆時雨收穫之際復屬秋霖慮害農功每祈孚佑遂得百神降福羣望效靈旣不爲災仍多善熟幽贊之德普洽於生人昭報之儀式遵於祀典宜令太子詹事嗣許王瓘祭東嶽光祿卿嗣鄭王希言祭中嶽宗正卿濮陽郡王徹祭西嶽少府監李知柔祭南嶽衛尉卿嗣吳王祇祭淮瀆光祿少卿彭果祭河瀆所司擇日錄奏其名山大川有路近處亦合便祭僻遠處委所繇長官備禮致祭務陳蠲潔以達精誠

十一月癸亥勅曰王者父事天母事地所以昭孝敬之道通神祇之德朕處奉明命備稽大猷實在緣情

不惟相襲伏以昊天上帝義在尊嚴恭惟祀典每屆
冬至既於是日有事於圓丘更受朝賀實深兢惕自
今已後冬至宜取以次日受朝仍永為常式壬申勅
曰敬惟明神普存於祀典咸秩羣望式重於邦畿頃
者分命使臣致誠嶽瀆山川便近亦已有處分其關
輔之內屢有陳祈王者所都禮亦異數應關內各山
大川各委所繇郡長官稍優於嘗禮致祭於京兆府
界宜委蕭炤同與少尹分祭倍崇精潔以副誠祈
十二月癸巳制曰惟神之主必恭禮祀率先之訓義
在躬親朕欽若昊穹子育黎庶思通明靈之德以洽

和平之理是修闕典咸秩無文如在之誠久陳於郊
廟懷柔之至亦徧於山川况九宮所主百神之貴上
分天極下統坤維陰陽生靈功深亭育故式昭新典
肇建明祠將以為人載祈孚佑宜叶元辰之吉用申
大祭之禮可以今月立春朕親祀九宮壇仍令中書
門下與禮官等即詳定儀注奏聞癸丑親祠九宮貴
神於東郊時有術士蘇嘉慶上言請於京城東朝日
壇東置九宮貴神壇三城成三赤四階其
上依位置九壇壇尺五寸東南曰昭攝正東曰軒轅
東北曰太陰正南曰天一中央曰天符正北曰太一
西南曰攝提正西曰咸池西北曰青龍五為中戴九
履一左三右七二四為上六八為下符於遁甲四孟
月祭尊為九宮貴神禮次昊天上帝而在太青宮太
廟之上用牲牢璧幣類於天地神祇帝親祀之如有

司行事郎
宰相爲之

四載勅風伯雨師竝依升入中祀乃令諸郡各置一壇因春秋祭社之日同申享祀至九月勅諸郡風伯壇置在社壇之東雨師壇之西各稍北三十步其壇卑小於社壇其祭官准祭社例取太守以下充五載正月乙亥詔曰五方定位嶽鎮總其靈萬物阜成雲雨施其潤上帝攸敘寰區是仰且岱宗西華先已封崇其中嶽等三方典禮所尊未齊名秩永言光被用叶靈心其中嶽神宜封爲中天王南嶽神爲司天王北嶽神爲安天王應須告祭仍令所司擇日聞

奏

四月乙亥詔曰皇天之典聿循於百代郊祭之儀允屬於三靈聖人旣因時以制宜王者亦緣情以革禮朕丕承寶運肅遵明禋曷嘗不克已齋心虔恭夙夜猶慮舊章或闕誠敬未孚有一於此良深祇畏且尊莫大於天地祭莫大於祖宗嚴配昭升豈宜異類今蒸嘗之獻旣著於嘗式南北之郊未展於時享粢盛且略對越何申自今已後每在四時孟月先擇吉日祭上帝其以皇地祇合祭以次日祭九宮壇皆令宰臣行禮奠祭務從蠲潔稱朕意焉祭神如在傳諸古

訓以多爲貴著自禮經臍骨之儀蓋昔賢之尚質甘
旨之品亦孝子之盡誠旣切因心方資變禮其已後
享太廟宜料外每室加嘗食一牙盤仍令所司務盡
豐潔發生振蟄雷爲其始畫卦陳象威物效靈氣實
本於陰陽功乃施於動植令雨師風伯久列嘗祠唯
此震雷未登羣望其已後每祀雨師宜以雷神同祭
朕承宗廟之福爲人神之主事有未暢義在得中庶
寅畏之誠上達於郊廟祈禳之典載收于闕遺凡在
有司各揚所職倍宜恭肅以叶靈心

十二月辛酉詔曰孝享宗廟所以達思誠也格於神

祇所以崇嚴敬也則祈穀上帝春祀先王永惟因心
敢忘如在朕承累聖之不業應上玄之福佑聿脩柴
瘞虔奉蒸嘗嘗慮備物未豐馨香莫達頃以詳諸舊
典創以新儀清廟陳牲加特於嘗餼昊天冬祭重增
以時享庶乎馨齊敬之勤叶殷薦之義况履茲霜露
載感惟深瞻彼郊壇有懷昭事念禮歸通變諒期乎
達誠教在率先必貴乎親奠宜以來載正月朕親謁
太廟便於南郊合祭仍令中書門下卽與禮官詳定
儀注擇日奏聞興言拜獻先深祇感凡百有司各供
爾職

六載正月戊子親祀南郊遂祀皇地祇詔曰四瀆五嶽雖差秩序與雲播潤蓋同利物崇號所及錫命宐均其五嶽旣已封王四瀆當升公位遞從加等以答靈心其河瀆宐封靈源公濟瀆封清源公江瀆封廣源公淮瀆封長源公仍令所司擇日差使告祭并五嶽及名山大川竝令所在長官致祭又諸州武舉人上省先謁太公廟拜將帥及行師尅捷亦宐告獻

七載五月壬午帝加尊號詔五嶽四瀆名山大川各令本郡長官致祭

八載六月詔曰九州之鎮實著禮經三代之典必崇望秩事旣屬於報功義有符於錫命其九州鎮山除入諸嶽外宐竝封公仍各置祠守者量更增修儲慶發祥當申昭報宐令所在長官各陳祭禮名山大川亦量事致祭

九月命宗正卿褒郡信王璆祭西嶽太僕少卿兼單于安北副大都護張齊丘祭北海蜀郡長史鮮于仲通祭江瀆太子詹事李旭祭北嶽尚書右丞李通遷祭河瀆詔曰朕肅恭明祀祈福上玄冀敷佑於黎蒸將昭報於靈應頃蠻夷款附萬里廓清稼穡豐穰羣方樂業豈惟菲德以致元和實賴神休永綏景貺思

崇望秩用展虔誠宥令宗正卿褒信郡王璆等卽分
往五嶽四瀆及四海致祭所經道次者名山大川亦
便致祭務令精意以稱朕懷

九載四月詔曰五材竝用時表上靈八水分流實稱
善利京師與壤秦甸王畿灞滻通於涇渭滂瀆匯於
灃瀆蓄洩雷雨滋育稼穡雖惠澤已及於蒸民而虔
誠猶闕於祀典聿崇精享庶達明神其涇渭灞滻等
分水宥令禮儀使左庶子韋述取今月二十九日一
時備禮致祭務陳蠲潔稱朕意焉

十載正月甲子有事於南郊合祭天地大赦天下制

曰禮者所以訓導人俗昭事明祇有因增修以會其
本况國之大典在於精禋必資備禮以章遵奉自今
已後攝祭南郊薦獻太清宮薦享太廟其太尉行事
前一日於致齋所具羽儀鹵簿公服引入朕親受祝
板乃赴清齋以展誠敬夫子孝奉親極敬惟愛歿有
思感霜露之感逾深祭以吉蠲蒸嘗之敬如在且廟
者貌也取象存焉是禮繇於情因心則感太廟宜置
內宮以備嚴奉仍於廟外造一院安置庶申罔極之
思無忘事生之禮嶽瀆山川蘊靈毓粹雲雨之澤利
及生人春秋之義存乎祀典况正其運序式遵咸秩

其五嶽四瀆及諸鎮山安令專使分往致祭其名山大川及諸靈跡先有祠廟者各令郡長官逐便致祭是月丁未封東海爲廣德王南海爲廣利王西海爲廣潤王北海爲廣澤王

二月己亥分遣嗣吳王祗祭東嶽齊天王嗣魯王宇祭南嶽司天王秘書監崔秀祭中嶽申天王國子祭酒班景倩祭西嶽金天王宗正少卿李成裕祭北嶽安天王衛尉少卿李潏祭江瀆廣源公京兆少尹韋嘗祭河瀆靈源公太子左諭德柳僊祭淮瀆長源公河南少尹豆盧回祭濟瀆清源公嗣道王鍊祭沂山

東安公江東道採訪使吳郡太守趙居貞祭會稽山永興公大理少卿李禎祭吳嶽山成德公潁王府長史甘守默祭霍山應靈公范陽郡司馬畢悅祭醫巫閭山廣寧公竝取三月十七日庚子一時致祭申命太子中允李隨祭東海儀王府長史張九章祭南海太子中允柳奕祭西海太子洗馬李隨榮祭北海加王位且行冊禮也

四月辛巳制曰王者臨馭萬國莫不尊奉五嶽至於迎氣致祭必在辨方正位朕丕承眷命肅事嚴禮庶有合於乾坤用永垂於典寶加以厚德載物莫先於

土推誠導氣必叶於時在曆數之有徵諒國家之所
感舍弘廣大利用豐功隨王雖布於四方歸本且闕
於中位朕式明統緒用答元符爰創新儀再修墜典
頃者每祝黃帝乃就南郊義實有乖禮亦非便稽諸
體式理固不然宜於皇城內西南就坤地改置黃帝
壇朕當親祠以昭誠敬仍令中書門下與禮官更審
參詳奏聞

十一月壬午詔曰禮神以玉者蓋取其精潔表心溫
潤合德爲器有象正辭乃信以達馨香其在珪璧瓊
來禮神六器及宗廟奠玉自馮紹正奏後有司並用

珉禮所謂君子貴玉而賤珉不可用也朕精禋郊壇
嚴敬宗廟奉惟新之祚庇太平之人則人力普存備
物以享安可以珉代玉惜費事神况國家之祈福有
萬方之助祭闕典必修無文咸秩豈於天地宗廟奠
玉有虧自今已後乾坤六器宗廟奠玉並用真玉諸
祀用珉如以玉難得大者寧小其制度以取其真
十二載二月制五嶽四瀆及名山大川并靈迹之處
各委郡縣長官致祭其祠宇頽毀者量事修葺
十四載八月辛卯制曰書云歲秩群祀詩曰懷柔百
神禾惟明徵豈忘昭報今秋稼穡頗勝嘗年實賴靈

祇福臻稔歲其五嶽四瀆所在山川及得道昇仙靈跡之處宜委郡縣長官至秋後各令醮祭務崇嚴潔式展誠享

是月癸未詔曰朕永念蒸人祈穀上帝而陰陽式序風雨不愆今獲稼穡阜成允賴神明幽贊也頃者虔心精享已申昭告其五嶽四瀆及天下諸郡山川近秋後展祭收穫既就農隙報功成秩抑惟其所在郡縣長官卽擇良辰以崇明祀

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

三十四

崇祭祀第三

唐肅宗至德二年二月帝在鳳翔改汧陽郡吳山爲西嶽增秩以祈靈助

乾元元年六月巳酉初置太一神壇於南郊圓丘東命中書侍郎同中書門下平章事王璵攝祭

二年正月丁丑親祀九宮貴神宿齋於壇所

上元元年閏四月己卯御明鳳門大赦改元詔曰自古明王聖帝名山大川並委州縣長吏擇日致祭又詔曰定禍亂者必先於武德拯生靈者諒在於師貞周武創業克寧區夏惟師尚父實佐興王况德有可師義當禁暴稽諸古昔爰崇典禮其太公望可追封爲武成王有司依文宣王置廟仍委中書門下擇古今名將如文宣置亞聖及十哲等享祭之典一同文宣

元年建子月詔曰皇王符瑞應協於靈祇典禮廢興式存於禮告蓋重成命以崇祇肅朕獲嗣鴻猷敢忘虔敬頃以三代正朔所尚不同百王徽號無聞異稱顧茲薄德思創常規爰因行慶之日將務惟新之典而建元立制冊命曆符受於天地祖宗申於百辟卿士今旣循諸古法讓彼虛名革故之宐已宣於臣下昭報之旨未展於郊廟因時備禮擇日陳誠克明恭已之心庶降庇人之福至誠斯感其在茲乎宐取今月二十八日朝獻太清宮二十九日享太廟元獻廟來月一日祭圓丘及太一壇是月己酉皇帝謁太清宮庚戌享太廟元獻廟建丑月辛亥朔拜南郊祭太

一壇禮畢還宮

代宗寶應二年五月丁卯改封北嶽爲寧天王

廣德二年二月乙亥親拜南郊祀昊天上帝於圓丘

戊子詔五嶽四瀆名山大川宜令所管致祭

三月丙午勅曰三代之初皆有神降監其德也天寶

啓之恭惟王業之初師及霍邑堅城未下大將阻兵

連雨積旬糧儲不給有白衣老父忽詣軍門稱霍山

之神謁大唐皇帝云東南取路八日雨止助帝破敵

盡如其言巖巖霍山九州之鎮興雲致雨功已洽於

生人親道輔德力更宣於王室朕纘承大寶膺受湯

休勝蠻之間誠明可接永言幽贊茲謂有孚惟天命

神據我斯意宜令禮儀使判官司封員外郎薛頤郎

往霍山致祭正詞以薦稱朕意焉

永泰元年正月癸巳改元制曰書稱成秩詩美懷柔

仰惟衆靈念茲多祐其五嶽四瀆名山大川宜令所

管牧宰精神致祭

大曆元年十一月甲子日長至御舍元殿大赦改元

制曰五嶽四瀆名山大川祀典攸存神理昭著宜以

禮致祭

五年四月丙午命太嘗寺復置先農馬祖壇依嘗式

享祭

六月詔曰五嶽四瀆名山大川神明所居風雨是主
室委中書門下分使致祭以達精誠

十一月庚寅日長至命有司祀昊天上帝於南郊
七年十一月辛卯日長至命有司祀昊天上帝於南
郊不視朝

八年十一月辛丑日長至不視朝命有司祀昊天
上帝於南郊

十一年十一月丙辰日長至命有司祀昊天上帝于
南郊不受朝賀

十二年八月增修北郊壇齊宮二十五間

十三年十一月丁卯日長至命有司祀昊天上帝于
南郊不視朝

德宗建中二年五月有司奏定張良穰苴孫武吳起
樂毅白起韓信諸葛亮李靖李勣配武成王廟先是開元

十九年始於兩京置齊太公廟以張良配乾元中追封齊太公為武成王令選歷代名將從祀然未之行祠宇日荒至是宰相盧杞京兆尹盧諶以盧者齊之裔乃鳩其裔孫若盧崔丁呂之族合錢以崇飾之請擇自古名將如孔門十哲皆配享詔下史官乃定穰苴等至是始奏定焉

三年閏正月甲戌令百寮謁武成王廟
貞元元年正月丁酉改元制天下名山大川委長吏

致祭
十一月癸卯日南至帝親祀昊天上帝於圓丘
二年四月壬午太常寺奉祭風伯雨師祝版准開元
禮凡有司攝事祝版應御署者進署訖皆北面再拜
其風伯雨師本是小祀竝有司行事天寶三載始升
諸星爲中祀亦無皇帝親祀風伯雨師之命有司自
是嘗與不同攝祭其祝版准中祠例各進署其再拜
案禮無文詔曰風雨等師升爲中祀有烈祖成命况
在風雨事切蒼生今雖無文朕當屈已再拜以申予
育萬姓之意

是月詔太常少卿裴郁等十人各就方鎮祭嶽鎮海
瀆等

三年閏五月徙風師壇于滄水東

四年五月初復御署祭嶽鎮海瀆祝版准開元禮每
歲祭嶽瀆祝版咸御署而遣之自上元元年權亭中
祀已下繇是因循不署及是太常卿董晉舉奏之帝
方崇祀典乃復舊制

六年二月甲申復祀元中司命司人司錄及靈星

五月以風師武成王等樂章付所司施行之

六月巳酉復祭五龍壇初開元中每歲以二月祭之

有司行事著於新禮自上元中罷中小祀其祭遂廢及是宰臣請復之帝始以是日親祭焉

十一月庚午日南至帝親祀昊天上帝於南郊

九年十一月癸未帝朝獻太清宮畢事宿齋於太廟

行宮甲申朝于太廟畢事齋於南郊行宮己酉日南

至帝郊祀

初帝以是歲有年蠻夷朝貢思親告郊廟於祀事尤重慎及將散齋謂宰臣曰在祀

散齋歸正寢攝心奉祀不可間外事其嘗務勿奏乃齋於別殿及命皇太子諸王行祭者皆受誓一日命妃媵辭於別所故事祈壇宮廟內壇及殿庭帝步武所皆設黃道禱壇十一位又施赤黃禱將有事皆命徹之又故事設御史版立于郊廟藉藉以禱及是帝虔禋拜首於地有司奉祠者莫不惕厲

順宗以貞元二十一年正月卽位四月冊皇太子詔

五嶽四瀆名山大川委所在長吏量加祭祀

憲宗元和二年正月辛卯有事於南郊詔天下名山

大川及古聖帝明王忠臣烈士各令以禮致祭

四年十月庚寅冊皇太子詔五嶽四瀆名山大川委

所在長吏量加祭祀

七年十月庚戌制冊皇太子五嶽四瀆名山大川委

所在長吏量加祭祀

穆宗長慶元年正月辛丑親祀昊天上帝於圓丘

七月壬子受冊尊號禮畢詔五嶽四瀆名山大川并

自古忠臣烈士各令所在以禮致祭

敬宗寶曆元年正月辛亥親祀昊天上帝於南郊
文宗太和元年六月乙卯詔曰依令有司約禮禱祀
宗廟徧祈山川務盡莊誠以副予志

三年六月太常寺奏北郊祀皇地祇壇先闕齋宮請
准祠例置一所可之

十一月甲午親祀昊天上帝於南郊

八年二月庚寅以疾瘳大赦詔曰百靈所佑獲遂痊
和虔奉神休敢忘昭報其五嶽四瀆天下名山大川
各委所在長吏致祭仍加豐潔以副精誠

九年二月丁丑詔曰王者受天地之明命續祖宗之

鴻業所以祇服大事致誠嚴禋盡其孝敬之心崇其
郊祀之禮必在匪懈不忒黍盛豐潔古今丕訓無易
於此朕嗣位十載恭臨萬邦務三時以厚生睦九族
以脩教每厲薄德汔茲小康中宵內愧懼不克稱寔
天地之睠佑祖宗之威靈思欲罄其精誠奉以昭報
豈聿懷之敢望寔如在而齋心如聞近歲有司因循
將事不恪牲牷無滌具之別籩豆乏靜嘉之容鼎俎
雖陳薦羞多闕祠官或怠於齊肅胥吏有至於喧呶
虧禮瀆神莫斯爲甚永言重事用懼深衷起今已後
太廟郊社齋卽先事前一日委監察御史子細點簡

如有替代非正身者當時禁身推問聞奏當重科懲
既責躬親須議優獎其齋郎委中書門下商量量與
減選應緣祠祭官下至齋郎及太嘗樂人吏等致齋
日有博奕飲酒喧呼爭競者亦委御史臺糾察聞奏
其牲宰准禮循行之際合視肥瘠之宜近日相承臨
時取辦既乖誠敬頗失舊章委太僕寺准禮令處分
如無本色牛羊速具聞奏至於酒醴醢醢簋簋膳羞
各委本司准禮令切加提舉凡在廟壻所宜肅敬縱
云隙地豈廢脩崇如有耕墾藝植者亦委御史臺糾
察聞奏攝事公卿雖約官品將朕誠敬必在得人委

尚書省差定之時稍加慎選其祭器禮物中如有欠
闕及濫惡須慎補改張者委太嘗宗正光祿太僕寺
少府監諸司速具條疏聞奏仍委中書門下卽與疎
理處分於戲禮崇明祀神享至誠上下苟無其違心
虔恭必冀於備物繇是怵惕興感齊莊致詞咨爾庶
工各揚厥職式遵禮典稱朕意焉
是年六月封鷄翁山爲侯先是翁造爲興元節度使
初往漢中遇大雨平地水尺餘若不可進禱鷄翁山
疾風驅雲卽時清霽及是帝憶聞其事會造爲御史
大夫入見得詳言當時靈貺明日下詔封之

開成二年四月辛酉詔曰每聞京師舊說以爲終南山興雲卽必有雨若當晴霽雖密雲他至竟不需霈况茲山北面闕庭日當恩顧修其望祀寵數宐及今聞都無祠宇巖谷湫却在命祀終南山未備禮秩湫爲山屬捨大崇細深所謂闕於興雲致雨之祀宐令中書門下且差官設奠宣告恩禮便令擇立廟處所廻日以聞然命有司卽時建立

八月乙未長安縣令杜慥奏准詔置終南山祠宇畢已酉册南山爲廣惠公

武宗會昌元年正月辛亥有事於南郊

十二月勅取來年春依天寶三年祀九宮貴神

五年正月辛亥有事於南郊

宣宗大中七年正月有事於南郊

懿宗咸通元年十一月丁未有事於南郊

四年正月庚午有事於南郊

僖宗乾符元年十一月庚寅有事於南郊

昭宗龍紀元年十一月甲寅有事於南郊

哀宗天祐二年六月湖南馬殷奏岳州洞庭青草二湖之側有古祠四所先以荒圯臣復修廟宇畢乞賜名額者勅旨黃陵二妃祠曰懿節洞庭君祠曰利涉

侯青草祠曰安流侯三閭大夫祠先以禮朗觀察使雷滿奏已封昭靈侯宣依天祐元年九月二十九日勅處分

九月中書門下奏伏自遷都已來武成王廟竝未置立今請改爲武明王

避未全忠父諱

其廟請於街西選地建

立其餘修置及配享十哲七十二弟子竝請准故事者從之

後唐莊宗初爲晉王天祐八年與梁軍戰於栢鄉因禡牙祀之曰南望栢人當漢祖擒奸之地北臨鄆邑有蕭王告類之亭一則成創業之功一則纂中興之

緒予遠提師旅將盪妖氛假二帝之威靈救萬邦之塗炭俯詳形勝用視郊原陣雲不散於長空殺氣正衝於殘孽逆溫背惠奸我同盟非厚載之所容在典刑而無赦將期勦戮以慰蒸人諒我忠勤幸資神助同光元年四月卽位制曰山林川澤祀典神祇各隨處差官崇修祭饗

十月德音應有百神祠宇不得有虧時祭

十一月辛丑勅天下州縣所有神祠本處差官告祭二年二月己巳朔有事於南郊

七月己酉幸龍門下雷山賽二人神北俗禡牙宣社

之禮也

明宗天成元年八月司天奏前月二十八日夜四鼓西北雷雲暴作秋事方興宐分命祠禱從之

二年十月甲申勅少府監聶廷祚等以大駕巡幸告祭神祠

四年七月壬辰制朕自嗣守丕圖勤修庶政于茲四稔罔怠萬機上實賴於祖宗下必資於卿士卑躬克儉景行前王側席求賢追蹤在哲日懼一日雖休勿休幸致風雨不憊干戈載戢九穗之禾應瑞足表豐年兩階之舞咸賓無虧曠代敢萌矜伐漸喜隆平然

而圓丘之禮未陳清廟之詩未著夙宵增懼寤寐興懷何以助天之高而報地之厚也且天覆予爲子民戴予爲君苟帝道未臻則人倫焉正必須燔柴瘞玉嚴六宗虞典之禮非敢刻石泥金竊萬歲嵩高之美凡在遐邇當體至懷朕取來年二月十一日有事於

南郊

八月丁酉大理正路毓奏竊見春秋釋奠於文宣王廟而武成廟久曠時祭國之二柄文武之宗請復嘗祀從之

九月戊辰祠部員外郎呂朋龜奏五龍祠九宮壇天

地三官置醮之禮久廢請依典故脩之
十二月中書奏今後宰臣致齋內不押班不知印不
赴內殿起居或遇國忌行事已受誓戒宜不赴行香
并不奏刑殺公事

長興元年二月乙卯親祀昊天上帝於圓丘

十二月巳酉命有司祭司寒神於水井

二年七月福建王延均上言當道神廟七所乞封王
號勅無諸史傳有名宜封爲閩越富義王其餘任自
于境內祭享是月勅天下州府應有神祠破損者仰
取公使錢添修

三年十二月庚戌勅祠祀祭器牲帛務從精潔齊宮
壇墠所司宜簡舉崇飾之

愍帝應順元年閏正月詔曰妖猥以冲人獲膺大寶
賴神祇之贊助顯天地之休禎夷夏駿奔式符於睠
命聲教綿遠虔荷於炳靈德薄承祧憂深馭朽克奉
治平之道諒繇冥助之功集是殊祥敢不寅畏賴陰
陽之行運致時雨以應期稼穡順成得歲功而叶望
咸臻上瑞普泰兆民宜令三京諸道州府界內名山
大川祠廟有益於民者以時精虔祭祀稱朕意焉
末帝清泰元年五月壬申詔曰吳嶽成德公昨遇享

期克申幽贊宐加王號以表神功可進封靈應王其
 祠享官屬仍舊同五嶽擇日冊命初帝在鳳翔將有
 沉闕之釁遣房嵩祠之有應至是欲加封爵下有司
 簡計奏曰天寶十載正月封吳山為成德公與沂山
 會稽醫無閭同制封公至德二年十二月改吳山為
 嶽祠享官屬視五嶽今國家以靈應告祥宐示殊等
 故有是命 至二年四月庚午授冊于少府
 監烏昭達往吳山祠封靈應王
 是月丙子詔諸州神祠有破壞者委所在給省錢補
 緝

十一月詔杭州護國廟改封崇德王城隍神改封順

義保寧王銅官廟改封福善通靈王湖州城隍神封
 阜俗安成王越州城隍神封興德保闡王從兩浙節
 度使錢元瓘奏也

二年三月庚申詔曰祠祭國家重事功在精虔若不
 提撕漸成疎慢今後監祭使每祭親視酒饌幣玉不
 得令饌料失於蠲潔如有所聞罪在監祭使其壇廟
 墻屋勿令疎漏本司嘗簡舉修葺以聞 山六
 四月戊辰考功員外郎李慎義上言今春以來稍愆
 雨澤陛下念稼穡之重深宵旰之憂倍軫聖心徧走
 羣望盈尺則告瑞於元朔如膏則潤洽於暮春可卜

豐穰動皆響應請天下凡祠宇有益於人者下本處嘗令修飾冀集洪休從之

晉高祖天福二年三月詔巡幸汴州中書奏車駕經過河南府河陽鄭州汴州管界所有名山大川帝王陵廟名臣等去路十里內者伏請下本州府各排比祇候車駕過日以酒脯醢祭告從之

五月湖南馬希範奏青草等四廟各乞進封勅青草廟安流侯宜進封廣利公洞庭廟利涉侯進封靈濟公磊石廟昭靈侯進封威顯公黃陵二妃廟舊封懿節廟改封昭烈廟

八月詔曰負國者天地不容為逆者人神共怒永惟躬饗實有感通昨出師之時將帥虔禱頗聞陰祐成此戰功唐衛國公宐封靈顯王其餘鄭州并汜水管內神祠宐令長吏差官點簡如有隳損處便委量事修葺貴申嚴飾以合陰功五嶽承天四瀆紀地自正當陽之位未伸望秩之儀宐令差官徧往告祭兼下逐州府量事修崇所有近廟山林仍宐禁斷樵牧十月丙戌命使祠五嶽四瀆六年正月戊寅詔曰全晉興區興王重鎮唐叔之英靈未泯臺駘之古廟猶存朕頃在并門長承陰助永

言正直空用封崇唐叔虞空封興安王臺駘空封昌寧公又詔曰嶽鎮司方海瀆紀地載諸祀典咸福蒸民將保豐穰空申虔敬俾加崇飾以奉神明其嶽鎮海瀆廟宇等空令各修葺仍禁樵蘇

七年二月勅唐州湖陽縣蓼山神祠空賜名為蓼山

顯聖之神仍下本州修葺廟宇

元襄州安從進作逆舉軍北來東京教坊

使充南面先鋒都監陳思讓進軍南行與從進相遇接蓼山列障俗以蓼與了字同音遂傳為不祥遂祈戰勝奏立廟額從進既敗行營都部署高行周以狀奏聞因有是勅

少帝以天福七年六月卽位十月封襄州利市廟為

順正王

十一月勅天地宗廟社稷及諸祠祭等訪聞自前所司承寬多不精潔空令三司豫支一年諸司合請祠祭禮料物色等於太廟置庫仍差宗正丞石載仁專主掌監察御史宋彥昇監庫兼差供奉官陳審璘往雒京於太廟內穩便處擘畫修庫屋五間候奉修畢催促所支禮料物色監送到庫交付宋彥昇石載仁竝同點檢入庫交付訖供奉官陳審璘齎交領文狀歸闕每有祠祭諸司各請禮料至時委監庫御史宋彥昇宗正丞石載仁旋給付逐司其太祠中祠兼令監察使點檢饌造一一須得精潔如或更致慢易本

司當準格律科罪其祭服祭器未有者脩製已有者更仰雅飾

漢隱帝乾祐三年八月以蒙州城隍神爲靈感王從湖南請也時海賊攻州城州人禱於神城得不陷故有是請希廣又言永州有杏將軍祠郡人水旱祈禱有應乞賜封崇勅宐賜太保
周太祖廣順元年正月卽位制曰國之大事在祠爲先苟不潔蠲深爲瀆慢如聞自前祠祭牢饌頗虧肅敬今後委監察御史嚴加覺察必須豐潔庶達精誠稍或不恭國有常典

二年五月親征兗州遣樞密院直學士陳觀祭堯廟翰林學士竇儀祭東嶽廟

三年三月西京留司太子少師楊凝式言諸祠祀之所竝無齋宮遣前染院使周重興監造與留司計會具料度事件以聞其太廟郊社要補葺處仍便檢計十月戊申內出御札曰王者應運開基子民育物罔不承天事地尊祖敬宗燔柴於泰壇用昭乾德瘞玉於方澤以答坤靈朕受命上玄宅心下土時已歷於三載漸至小康禮未展於二儀深虧大典夙宵愧畏不敢違寧宐叶著龜式陳籩豆庶展吉蠲之禮用傾

昭事之誠朕以來年正月一日於東京有事於南郊
宐令所司各備儀注務從省約無致勞煩凡有供需
并用官物府縣不得因便差配諸道州府不得以進
奉南郊爲名輒有率斂庶俾嚴靜以奉郊禋中外臣
僚當體予意

顯德元年正月丙子朔太祖親祀圓丘

世宗以顯德元年正月丙申卽位八月丁未以風雨
時若遣官分祭羣祠

二年七月丙子帝謂侍臣曰朕聞國之大事在祀與
戎近代以來急於戎事祭祀之禮幾如墜地且牲牢
之具簠簋之數蓋主誠信誠信不至神何享焉今後
宐令所司各舉其職務在豐潔

八月乙丑詔曰今後諸處祠祭應有牲牢香幣饌料
供具等仰委本司官吏躬親簡較務在精至行事儀
式依禮經大祠祭合用樂者仍須祀前教習凡闕祀
事宐令太嘗博士及監察御史用心點檢稍或因循
必行朝典先是以太嘗禮院上言郊壇宗廟禮物多
闕故有是命

四年二月庚午詔有司添修祭器法物等先是帝以
郊廟祭器皆繇所司相承製造年代寔遠式樣訛舛

乃令國子博士聶崇義檢閱禮書模畫其樣以聞至是故有是命

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

帝王部 三十五

封禪

禮曰昔先王因天事天因地事地因名山升中于天書曰天子五載一巡狩歲二月東巡狩至於岱宗柴望此封禪之大略也昔齊桓公欲封禪管仲曰古者封泰山禪梁甫七十二家皆受命然後得封禪是知

冊府元龜

帝王部

卷之三十五

王者受昊天之神命居大寶之位順考古道建用皇極仁及乎行葦澤浸乎昆蟲太平之風於是乎在若乃建顯號施尊名揚英聲騰茂實以祈景福以告成功則必申命有司發揮大典刻石紀績與黃帝比探策告祥配天無極故兒寬謂之帝王之盛節相如亦曰天下之壯觀可不謂然乎

無懷氏封泰山禪云云無懷古之王者在伏羲前云云在梁父東山名也又曰云

云山在蒙陰縣故城東北下有

處義封泰山禪云云處讀曰伏

神農氏封泰山禪云云

炎帝封泰山禪云云炎帝神農後

黃帝封泰山禪亭亭地理志鉅人有亭亭山

顓頊封泰山禪云云

帝嚳封泰山禪云云

堯帝封泰山禪云云

舜封泰山禪云云

禹封泰山禪會稽

湯封泰山禪云云

周成王封泰山禪於社首在鉅平南十二里

漢武帝議欲放古巡狩封禪之事放依也音甫往切諸儒對

者五十餘人未能有所定先是司馬相如病死有遺

書頌功德言符瑞足以封泰山上奇其書又司馬相如傳載相

如既病免家君茂陵天子曰司馬相如病甚可往從悉取其書若後之矣所忠往而相如已死家無遺書

問妻對曰長卿未嘗有書也時時書人又求去長卿未死時為一卷書曰有使來求書奏之其遺札書

言封禪事所忠以問左內史兒寬寬對曰陛下躬發

奏焉天子異之聖德統攝羣元統察攝聚也輯與集三字並同

祀天地薦禮百神精神所嚮徵兆必報天地竝應符

瑞昭明其封泰山禪梁父昭姓考瑞帝王之盛節也

然享薦之義不著于經封禪之享薦也以非嘗禮故經無其文以為封

禪告成合祛於天地神祇祛開散合閉也祇戒精專

以接神明總百官之職各稱專宐而為之節文稱副也

唯聖主所繇制定其當當猶中也其羣臣之所能列今將

舉大事優游數月言不決也使羣臣得人自盡終莫能成

所言不同各有執見也唯天子建中和之極兼總條貫金聲而

玉振之言振揚德音如金玉之聲也以順成天慶垂萬世之基帝

然之乃自制儀采儒術以文焉既成將用事拜寬為

御史大夫初議封禪曰古者先振兵釋旅然後封禪

廼遂北巡朔方勒兵十餘萬騎還祭黃帝冢橋山釋

兵涼如地名帝曰吾聞黃帝不死有冢何也或對曰黃

帝已仙上天羣臣葬其衣冠既至甘泉為且用事泰

册序元龜 帝王部 卷之三十五 三

山先類祠秦一且猶將也類祠謂以事類而祭之自得寶鼎上與公

卿諸生議封禪封禪用希曠絕莫知其儀體而羣儒

采封禪尚書周官王制之望祀射牛事天子有事宗廟必自射牲

示親殺也齊人丁公年九十餘曰封禪者古不死之

名也秦始皇不得上封陛下必欲上稍上稍漸也即無

風雨遂上封矣上於是廼令諸儒習射牛草封禪儀

數年至且行天子既聞公孫卿及方士之言黃帝以

上封禪皆致怪物與神通欲放黃帝放依也音甫往反以接

神人蓬萊高世比德于九皇上古有人皇者九人而頗采儒術

以文之羣儒已不能辨明封禪事又拘于詩書古文

而不敢騁帝為封祠器視視讀曰示羣儒羣儒或曰不與

古同徐偃又曰太嘗諸生行禮不如魯善徐偃博士姓名周

霸屬圖封事屬會也會諸儒圖封事周霸人姓名也於是帝黜偃霸而

盡罷諸儒弗用以元鼎六年五月東幸緱氏禮登中

嶽太室從官在山上聞若有言萬歲云問上上不言

問下下不言廼令祠官加增太室祠禁毋伐其山水

以山下戶凡三百封嵩高為之奉邑嵩古崇字以崇奉嵩之山故謂

之嵩高奉邑也詔曰朕用事華山至於中嶽獲駮鹿見夏后

啓母石翌日親登嵩高御史乘屬在廟傍天子出御史除二人

乘為曹護車駕吏卒咸聞呼萬歲者三登禮罔不答其令祠

册府元龜 帝王部 卷之三十五 四

官加增太室祠禁無伐其草木以山下戶三百爲之

奉邑名曰密高獨給祠復亡所與夏四月癸卯帝因

東上泰山

言易上也泰山從南面直上步道三十里車道百里

泰山草木未生

迺令人上石立之泰山顛

從山下轉右而上也

帝遂東巡海上

行禮祠八神帝還至奉高帝念諸儒及方士言封禪

人殊不經難施行

人人殊異文不合經故難以施行

天子至梁父禮

祠地主至乙卯令侍中儒者皮弁縉紳射牛行事封

泰山下東方如郊祀泰一之禮封廣丈二尺高九尺

其下則有玉牒書書秘禮畢天子獨與侍中奉車子

子候霍去疾病子也

上泰山亦有封其事皆禁明日下陰道

丙辰禪泰山下阯東北肅然山如祭后土禮天子皆

親拜見衣上黃而盡用樂焉江淮間一茅三脊爲藉

五色土益雜封縱遠方奇獸飛禽及白雉諸物願以

加祠咒牛象犀之屬不用皆至泰山然後去封禪祠

其夜若有光晝有白雲出封中

雲出于所封之中

天子從封

禪還坐明堂羣臣更上壽

更互也

詔曰朕以眇身承至

尊兢兢焉惟德菲薄不明於禮樂故用事八神遭天

地况施著見景象肩

肩同

然如有聞震於怪物欲止不

敢遂登封泰山至於梁父然後升壇肅然自新嘉與

士大夫更始其以十月爲元封元年行所巡至博奉

高蚺丘歷梁父城民田租逋賦貸已除

逋賦未出賦者逋貸官以

物貸之而未還也

加年七十已上孤寡帛人二疋四縣無出

今年筭

自博至梁父凡五縣今云四縣奉高素以供禪非筭限

賜天下民爵一

級女子百戶牛酒又曰古者天子五載一巡狩用事

泰山諸侯有朝宿地其令諸侯各治其邸泰山下

二年帝伐朝鮮夏旱公孫卿曰黃帝時封則旱乾封

三年

三歲不雨暴所封之土今乾也

上廼下詔天旱意乾封乎

言適新封

則致天旱欲乾我所封乎

其令天下尊祠靈星焉秋作明堂於泰

山下

五年春還至泰山增封甲子祠高祖於明堂以配上

帝因朝諸侯王列侯受郡國計

若今之計帳

初封泰山東

北陟古時有明堂處處險不敞

言其阻

帝欲治明堂奉

高旁未曉其制度濟南人公玉帶

公玉姓帶名也呂氏春秋齊有公玉

丹此蓋其舊族而說者讀公玉為宿非也單姓玉者後漢司徒王况自音宿耳

上黃帝時明

堂圖明堂中有一殿四面無壁以茅蓋通水水圜宮

垣為複道上有樓從西南入

樓讀曰復

名曰昆侖天子從

之人以拜祀上帝焉於是帝令奉高作明堂汶上如

帶圖

汶水名也出琅琊朱虛作所上明堂于汶水之上也帶圖公玉帶所上明堂圖

及是歲

脩封則祠泰一五帝於明堂上坐合高帝祠坐對之

漢是時未以高祖配天言對武帝以來乃配之

祀后土於下房以二十太牢

天子從昆侖道入始拜明堂如郊禮畢祭堂下而上
秦古燎字又上泰山自有秘祠其顛而泰山下祠五帝各如其方黃帝并赤帝所與赤帝同處有司侍祠焉山上舉火下悉應之

太初元年十月行幸泰山十一月甲子朔旦冬至祀

上帝于明堂十二月禮高里山名在泰山下

三年正月行東巡海上四月還脩封泰山禮石閭石閭在泰山下陞南方

方士言仙人閭

天漢三年三月行幸泰山脩封祀明堂因受計

太始四年二月行幸泰山壬午祀高祖於明堂以配

上帝因受計癸未祀孝景皇帝於明堂甲申脩封丙戌禮石閭

征和四年幸泰山脩封庚寅祀于明堂癸巳禮石閭

先是武帝每脩封其贊饗曰天增授皇帝泰元神策

周而復始皇帝敬拜泰一自此已上贊祝者辭又東至海上考

入海及方士求神者莫驗焉益遣幾遇之益多也幾讀曰冀

後又親禪高里祠后土臨渤海將以奉祀蓬萊之屬

幾致殊庭焉殊庭蓬萊中仙人庭也幾讀曰冀復東巡海上考神仙

之屬未有驗者方士有言黃帝時為五城十二樓昆侖

玄圃五城十二樓仙人之所嘗居以候神人於執期地名也名曰迎年

迎年若云其年 帝許之如方名曰明年 言明其得延年也 帝親禮祠

上犢黃馬公玉帶曰黃帝時雖封泰山然風后封鉅

岐伯令黃帝封東泰山 風后封鉅岐伯皆黃帝臣也東泰山在琅琊朱虛界中有

小秦山是 禪几山 几山在朱虛縣 合符然後不死天子既令設祠

具至東泰山卑小不稱其聲乃令祠官禮之而不封

焉其後令帶奉祠候神物復還泰山脩五年之禮如

前而加禪祠石闕石闕者在泰山下陞南方 下基之南面

方士言僊人間也故帝親禪焉其後復至泰山脩封

還過祭恒山自封泰山後十三歲而周遍於五嶽四

瀆矣後復至泰山脩封其泉泰一汾陰后土三年親

郊祀而泰山五年一封脩武帝凡五脩封

後漢光武建武三十年二月羣臣上言即位三十年

宜封禪泰山詔曰即位三十年百姓怨氣滿腹吾誰

欺欺天乎曾謂泰山不如林放何事汙七十二代之

編錄桓公欲封管仲非之若郡縣遠遣吏上壽盛稱

虛美必髡兼令屯田從此羣臣不敢言三月帝幸魯

過泰山告太守以帝過故承詔祭山及梁父時虎賁

中郎將梁松等議記曰齊將有事泰山先有事配林

蓋諸侯之禮也河嶽視公侯王者祭焉宜無即事之

漸不祭配林

丹府元龜 帝王部 卷之三十五 八

三十二年正月帝齋夜讀河圖會昌符曰赤劉之九會命岱宗不慎克用何益於承誠善用之姦僞不萌感此文乃詔松等復案索河雒讖文言九世封禪事者松等奏乃許焉初孝武帝欲求神仙以秩方者言黃帝繇禪封而後僊於是欲封禪封禪不嘗時人莫知元封元年帝以方士言作封禪器以示羣儒多言不合古於是罷諸儒不用三月帝東上泰山乃上石立之泰山顛遂東巡海上求仙人無所見而還四月封泰山恐所施用非是乃秘其事帝許梁松等奏求元封時封禪故事議封禪所施用有司奏當用方石

再累置壇中背方五尺厚一尺用玉牒書藏方石牒厚五寸長尺三寸廣五寸有玉簡又用石簡十枚列於石傍東西各三南北各二皆長三尺廣一尺厚七寸簡中刻三處深處四寸方五寸有蓋簡用金縷五周以水銀和金以爲泥玉璽一枚方二寸二分一枚方五寸方石四角又有距石皆再累枚長一丈厚一尺廣二尺皆在圓壇上其下用距石十八枚皆高二尺厚一尺廣二尺如小碑環壇立之去壇三步距石下皆有石跗入地入地四尺又用石牌高九尺廣三尺五寸厚尺二寸立壇兩地去壇三丈以上刻書帝

以用石功難又欲及二月封故詔松欲因故封石空
簡更加封而已松上疏爭之以爲登封之禮告功皇
天垂後無窮以爲萬民也承天之敬尤宜章明奉圖
書之瑞尤宜顯著今因舊封竄寄玉牒故石下恐非
重命之義受命中興宜當特異以明天意遂使太山
郡及魯趣石工宜取完清石無必五色時以印工不
能刻玉牒欲用丹漆書之會求得能刻玉者遂書書
秘刻方石中命容玉牒二月帝至奉高遣侍御史與
蘭臺令史將工先上山刻石文曰維建武三十有二
年二月皇帝東巡狩至於岱宗柴望秩於山川班於

群神遂觀東后從臣太尉熹行司徒事特進高密侯
禹等漢賓二王之後在位孔子之後褒成侯序在東
後藩王十二咸來助祭河圖赤符曰劉秀發兵捕不
道四夷雲集龍鬪野四七之際火爲主河圖會昌符
曰赤帝九世巡省得中治平則封誠合帝道孔鉅則
天文靈出地祇瑞興帝劉之九會命岱宗誠善用之
姦僞不萌赤漢得興九世會昌巡岱皆當天地扶九
崇經之嘗漢大興之道在九世之王封于泰山刻石
著紀禪于梁父退省考五河圖合古篇曰帝劉之秀
九名之世帝行德封刻政河圖提劉子曰九世之帝

方明聖持衡拒九州平天下予雜書甄曜度曰赤三
德昌九世會脩符合帝祭勉刻封孝經鈞命決曰予
誰行赤劉用帝三建孝九會脩專茲竭行封岱清河
維命后經讖所傳昔在帝堯聰明密微讓與舜庶後
裔握機王莽以舅后之家三司鼎足冢宰之權勢依
託周公霍光輔幼歸政之義遂以篡叛僭號自立宗
廟隳壞社稷喪亡不得血食十有八年楊徐青三州
首亂兵革橫行延及荊州豪桀并兼百里屯聚往往
僭號北狄作寇千里無烟無雞鳴犬吠之聲皇天睽
顧皇帝以匹庶受命中興年二十八載興兵起是以
中次誅討十有餘年罪人斯得黎庶得居爾田安爾
宅書同文車同軌人同倫舟輿所通人迹所至靡不
貢職建明堂立辟雍起靈臺設庠序同律度量衡修
五禮五玉三帛二生一死贊吏各修職復于舊典在
位三十有二年年六十二乾乾日昃不敢荒寧涉危
歷險親巡黎元恭肅神祇惠恤耆老理庶遵古聰允
明恕皇帝惟慎河圖雜書正文是月辛卯柴登封泰
山甲午禪于梁陰以承靈瑞以爲兆民永茲一事垂
于後昆百寮從臣郡守師尹咸蒙祉福永永無極秦
相李斯燔詩書樂隳禮壞建武元年以前文書散亡

舊典不具不能明經文以章句細微相况八十一卷
明者爲驗又其十卷皆不昭誓子貢去告朔之餼羊
子曰賜也爾愛其羊我愛其禮後有聖人正失誤刻
石訖二十一日辛卯晨燎祭天於太平山下南方羣
臣皆從用樂如南郊諸王王者後二公孔子後褒成
君皆助祭位事畢將升封或曰太山雖已從食於柴
祭今親升告功宐有禮祭於是使謁者以一特牲於
嘗祠太山處告祠太山如親耕耤劉先祠先農先虞
故事至食時御輦升山日中後到山上更衣早脯時
卽位于壇北面羣臣以次陳後西上畢位上壇尚書

命奉玉牒簡皇帝以一寸二分璽親封之訖太嘗命
人發壇上石尚書命藏玉牒以復石覆訖尚書令以
五寸甲封石簡事畢皇帝再拜羣臣稱萬歲命人立
所刻石碑乃復道下二十五日甲午禪祭地於梁陰
以高后配山川羣神從如元始中北郊故事國月巳
卯大赦天下以建武三十二年爲中元元年復博奉
高羸勿出元年租芻藁以吉日刻玉牒書函藏金匱
璽印封之乙酉使太尉行事以特告至高廟太尉奉
匱以告高廟藏于廟室西壁石室高祖室之下

又趙熹傳

載熹爲太尉上言宜封禪正三王之禮中元元年從
封太山又張純傳載純爲司徒奏帝宜封禪曰自古

受命而帝治世之隆必有封禪以告成功焉樂動聲
儀曰以雅治人風成於頌有周之盛成康之間郊配
封禪皆可見也書曰歲二月東巡狩至于岱宗則封
禪之義也臣伏見陛下受中興之命平海內之亂修
復祖宗撫存萬姓天下曠然咸蒙更生恩德雲行惠
澤雨施黎元安命夷狄慕義詩云受天之祜四方來
賀今攝提之歲蒼龍甲寅德在東宮宜及嘉時遵唐
帝之典繼孝武之業以二月東巡狩封于岱宗明中
興勤功勳復宗統報天神禪梁父祠地祇傳祚子孫
萬世之基也中元元年正月丁卯帝乃東巡岱宗以
純視御史大夫從弁上
元封舊儀及刻石文

章帝元和二年二月辛未幸泰山柴告岱宗有黃鵠

三十從西南來經祠壇上東北過于宮屋翺翔升降

進奉高壬申從祀五帝於汶上明堂癸酉告祀二祖

四宗 二祖謂高祖世祖四宗謂文帝為太宗
武帝為世宗宣帝為中宗明帝為顯宗 大赦天

下諸犯罪不當得赦亦皆除之復博奉高蠶無出今

年田租芻藁丁鴻以少府從帝奏曰臣聞古之帝王

統治天下五載巡狩至于岱宗柴祭于天望秩于山

川協時月正日角斗斛權衡使人不爭陛下尊履蒸

蒸奉承業祀五帝於明堂配以光武二祖四宗咸有

告祀瞻望太山嘉澤降澍柴祭之日白氣上升與燎

燿合黃鵠羣翔所謂神人以和答饗之休符也帝善

焉

安帝延光三年二月辛卯幸太山柴告岱宗 太山王
者告代

之處為五嶽之宗故
曰岱宗燔柴以告天

魏明帝黃初中護軍蔣濟曰夫帝王大禮巡狩爲先
昭祖揚禰封禪爲首是以自古革命受符未有不蹈
梁父登太山刊無竟之名紀天人之際者也故司馬
相如謂有文已來七十二君或順所繇於前謹遺教
於後太史公曰主上有聖明而不宣布有司之過也
然則元功懿德不刊梁山之石無以顯帝王之功示
兆庶不朽之觀也語曰當君而歎堯舜之美譬猶人
子對厥親而譽他人之父今大魏乘百王之弊亂拯
流遁之艱危接千載之衰緒繼百代之廢業自武文
至于聖躬所以參成天地之道網維人神之化上天

報應嘉瑞顯祥以比往古無所取喻至於歷世迄今
未廢大禮雖志在掃盡殘盜蕩滌餘穢未遑斯事若
爾三苗倔強於江海大舜當廢東巡之儀徐夷跳梁
於淮泗周成當止岱嶽之禮且去歲破吳虜於江漢
今茲屠蜀賊於隴右其震蕩內瀆在不復淹無累于
封禪之事也此議久廢非倉卒所定宜下公卿廣撰
其禮卜年考時昭告上帝以副天下之望臣待罪軍
旅不勝大願冒死以聞詔曰聞蔣濟斯言使吾汗出
流足自開闢以來封禪者七十餘君耳故太史公曰
雖有受命之君而功有不洽是以中間廣遠者下有

餘年近者數百載其儀闕不可得記吾何德之修敢庶茲乎濟豈謂世無管仲以吾有桓公登太山之志乎吾不欺天也濟之所言華則榮矣非助我者也公卿侍中尚書嘗侍省之而已勿有所議亦不須答詔也天子雖拒濟議而實使高堂隆草封禪之儀以天下未一不欲便行大禮會隆卒不復行

晉武帝平吳混一區宇太康元年九月庚寅尚書令衛瓘尚書左僕射山濤右僕射魏舒尚書劉寔司空張華等奏曰臣聞肇自生靈則有后辟年載之數莫之能紀立德濟世揮揚仁風以登封泰山者七十有

四家其謚號可知者十有四焉沉淪寂寞曾無遺聲者不可勝記大晉之德始自重黎實佐顓頊至於夏商世序天地其在於周不失其緒金德將升世濟明聖外平蜀漢海內歸心武功之盛實繇文德至于陛下受命踐祚弘建大業羣生仰流惟獨江湖沅湘之下表凶桀負固歷代不賓神謀獨斷命將出討兵威暨加數旬蕩定羈其鯨鯢赦其罪逆雲覆雨施八方來同聲敎所被達於四極雖黃軒之征大禹遠畧周之奕世何以尚今若夫玄石素文底號前載象以數表言以事告雖古河圖雒書之徵不是過也宜宣大典

禮中嶽封泰山禪梁父發德號明至尊享天休篤黎庶勤千載之表播流後之聲俾百世之下莫不興起斯帝王之盛業天人之至望也詔曰今逋寇雖殄外則障塞有警內則百姓未康此盛德之事所未議也瓘等又奏曰今東漸于海西被于流沙大漠之陰日南北戶莫不通屬茫茫禹迹今實過之天人之道已同巍巍之功已著宜修禮地祇登封泰山致誠上帝以答神人之願也乞如前奏詔曰今陰陽未和政刑未當百姓未得其所豈可以勒功告成邪詔不許瓘等又奏曰臣聞處帝王之位者必有歷運之基天命

之應濟兆庶之功者必有聖德之容告成之典無不可誣有不敢讓自古道也而明詔謙冲屢辭其禮雖聖德攸在推而未居夫三公職典天地實掌人物國之大事取義於此故漢氏封禪非是官也不在其事臣等前奏蓋陳祖考之功天命又應陛下之德合同四海迹古考今宜修此禮至於克定歲月須五府上議然後奏聞詔曰雖蕩清江表皆臨事者之勞何足以告成方望羣后恩隆大化以寧區夏百姓獲乂與之休息斯朕日夜之望無所復下諸府矣瓘等又奏臣聞唐虞三代濟世弘功之君莫不仰承天休俯協

人志登介丘履梁父未有辭焉者蓋不可讓也今陛下動高百王德無與二茂績宏規巍巍之業固非臣等所能究論而聖旨勞謙屢自抑損時至弗應推美不居闕皇代之上儀塞靈祇之凝望使大晉之典謨不同風於三五臣等誠不敢奉詔請如前奏施行詔曰方當共思弘道以康庶績且俟他年無復紛紜也王公有司又奏自古聖明光宅四海封禪名山著於史籍作者七十四君矣舜禹之有天下也巡狩四嶽躬行其道易著觀俗省方禮有升中於天詩頌陟其高山皆載在方策文王爲西伯以服事殷周公以魯

藩列於諸侯或享於岐山或有事太山徒以聖德猶得爲其事自是以來功薄而僭其儀者不可勝數號謚不泯以至於今况高祖宣皇帝肇開王業海外有截世宗景皇帝濟以大功輯寧區夏太祖文皇帝受命造晉盪定蜀漢陛下應期龍興混一六合澤被羣生威震無外昔漢氏失統吳蜀鼎峙兵興以來近將百年地險俗殊人望絕塞今不羈之寇二代而平非聰明神武先天弗違孰能巍巍其成功若茲者歟臣等幸以千載得遭運會親服大化日觀太平至公至美誰與爲讓宐祖述先明憲章古昔勒功岱嶽登封

告成弘禮樂之制正三雍之典揚名萬世以顯祖宗是以不勝大願敢昧死以聞請告太嘗具禮儀帝復詔曰所議誠列代之盛事也然方今未可以爾便報絕之

隋文帝開皇九年平陳朝野物議咸願登封秋七月丙午詔曰登封命一將軍除一小國遐邇注意便謂太平以薄德而封名山用虛言而干上帝非朕攸聞而今以後言及封禪宜禁絕又定州刺史豆盧通等上表請封禪帝不許又兗州刺史薛崑以天下太平登封告禪帝王盛烈遂遣博士登太山觀古跡撰封

禪圖及儀上之高祖謙讓不許

十四年羣臣請封禪高祖不納晉王廣又率百官抗表固請帝命有司草儀注於是牛弘辛彥之許善心姚蔡虞世基等創定其禮奏之帝遂巡其事曰此事體大朕何德以堪之但當東狩因拜岱山耳

十五年春行幸兗州遂次岱嶽爲壇如南郊又壇外爲柴壇飾神廟展宮懸於庭爲埋埴二於南門外陳樂設位於青帝壇如南郊帝服袞冕乘金輅備法駕而行禮畢遂詣青帝壇而祭

唐太宗貞觀五年正月朝集使趙郡王孝恭等僉議

以爲天下一統四夷來同詣闕上表請封禪帝手詔曰省表具懷自有隋失道四海橫流百王之弊於斯爲甚朕提劔鞠旅首啓戎行扶翼興運克成鴻業遂荷慈睠恭承大寶每日具思治弗敢康寧兢兢夕惕用忘興寢履薄馭朽不足爲喻賴三靈顯命百辟同心海外無塵遠夷慕義但流道永久凋殘未復田疇多曠倉廩猶虛家給人足尙懷多愧豈可遽追前代取譏虛美所望恂恂濟濟叶力盡誠輔其不逮致之王道如得雅頌形於金石菽粟同於水火反朴還淳當如來議

十二月己亥朝集使利州都督武士護等詣朝堂又上表請封禪帝曰隋末分離羣兇競逐我提三尺劍數年之間正一四海是朕武功所定也突厥強梁世爲紛更今乃襲我衣冠爲我臣吏殊方異類輻轉鴻臚是朕文教所來也突厥破滅君臣爲俘安養之情同於赤子是朕仁愛之道也林邑貢能言鳥新羅獻女樂憫其離本皆令反國是朕敦本也酬功錄効必依賞格懲惡罰罪必據刑書割親愛捨嫌隙以弘至公之道是朕崇信也非朕苟自矜伐欲明聖人之教不徒然也比年穀稼頻登疾疫不作誠宜展禮名山

以謝天地但以喪亂之後民物凋殘憚於勞費所未
遑也

六年公卿百寮以天下太平四夷賓服詣闕請封禪
者首尾相屬帝不許嘗從容而言曰朕本諸公子也
始望不及此屬天下喪亂遂有救焚拯溺之志義師
入關之始羣凶鼎沸當此之時但得三分天下亦爲
足矣朕以不武內稟太上皇之謀外假士大夫之力
數年之間六合大定升中告禪信亦其時然朕在者
蒙犯霜露遂嬰氣疾但恐登封之後彌增誠懼有乖
營衛非所以益朕也少欲自怡用安年壽公卿等勿

復爲言

十一年帝將有事於封禪國子博士劉伯莊睦州剡
史徐令言等皆上封禪事互設疑惑言新禮簡畧事
有未周於是勅四方名儒博物之士及顏師古朱子
奢等參議得失者數十家迺相駁難紛紜不決於是
左僕射房玄齡特進魏徵中書令楊師道慎採衆議
以爲永式議昊天上帝壇其略曰將封先祭義在告
神固當爲壇下陞謙申齊潔贊饗已畢然後登封旣
表重慎之深兼示行事有漸今請祭於太山下設壇
以祀上帝以太祖景皇帝配饗壇長一十二丈高一

丈二尺又議製玉牒曰金玉重寶質性貞堅宗祀郊
禋皆充器幣豈嫌華靡寔貴精確况乎三神壯觀萬
代鴻名禮極殷崇事資藻緝玉牒玉簡式縕靈琦傳
之無窮永存不朽今請玉牒長一尺三寸廣厚各五
寸玉簡厚二寸長短濶狹一如玉牒其印齒請隨璽
大小仍纏以金繩五周又議玉策曰封禪禮祭嚴配
作王皆奠玉策肅奉慶成今玉策四枚各長一尺三
寸五分每策五簡俱以金編其一奠上帝一奠太祖
座一奠方地祇一奠高祖座又議金匱曰祭配之策
盛以金匱歸格藝祖藏之朝堂今請長短令容玉策

高廣各六寸形如今之表函纏以金繩封以金泥印
以受命璽又議方石璽累藏玉牒止用石函亦猶盛
書策笥所以或呼石策今請方石三枚以爲再累其
十枚石簡刻石石四邊而立之纏以金繩封以石泥
印以受命璽又議太山上園壇曰四出開道壇場通
議南面入升於事爲允今請介丘山園壇廣五丈高
九尺用五色土加之四面各設一陛御位在壇南升
自南陛而就上封玉牒又議園壇上土封曰凡言封
者皆是積土之名利建分封亦班土立號謂之封禪
厥義可知今請於園壇之上安置方石璽緘旣畢加

土築以爲封高一丈二尺而廣二丈以五色土益封
玉牒書藏於其內祀禪之所土封制亦同此議玉璽
曰謹詳前載方石緘封玉檢金泥必資印以爲秘固
今請依令用受命璽以封石簡其玉簡旣與石簡大
小不同請更造璽一枚方一寸二分文同受命以封
玉牒石檢私制依漢建武時故事又議立碑曰勒石
紀號垂裔後昆美盛德之形容闢后王之休烈其義
遠矣陛下聲暢九垓威橫八極靈祇不愛其寶兆庶
無得而稱但當贊述希夷以攄臣下之志其登封及
禪并肆覲之壇竝請刻頌立碑顯揚功業又議設告

至壇曰旣至山下禮行告至柴於東方上帝望秩遍
禮羣神今請其壇方八丈一尺高三尺陛仍四出其
禪方壇及自餘儀式請從今禮仍請柴望秩同時行
事又議廢石闕及大小距石曰距石之設意取牢固
本資實用豈云彫飾今旣積土厚封足與天長地久
其小距圍壇石闕廻建事非經誥無益禮儀煩而非
要請從減省以十五年奏從此議餘皆罷之遂附制
于今禮永垂於後焉
十四年十月甲戌趙王元景等表請封禪帝冲讓不
許至於再三壬辰詔曰夫功成道合古今以爲隆平

登封降禪聖賢謂之大典是以出震則天之后革夏
變商之君繼韶夏而施尊名崇號諡而廣符瑞顧遲
遲焉羣臣區區誠爲此也原夫大始云構生靈厥萌
黎庶布乎穹壤皇王司其右契遐哉上古以迄於茲
歷選休徵未有如今日之盛也所以敢罄窺管無懼
觸鱗瀝膽披肝言亦備矣援天引聖辭亦殫矣幸蒙
亨育之澤降以聽覽之恩大賚雖敷猶申後命未便
渙汗方事逡巡懷生之徒不遑寧處伏乞皇帝陛下
則天成務應物爲心協三才之會昌乃霈然而動色
遂萬姓之延首俯凝旒而改容雖復龍圖告徵龜書

襲吉尚諮諏於四嶽建明謨於兆人欲使六合之中
沃心通於朝野八紘之內下問浹於華戎凡在人靈
疇無抃躍今茲百辟咸集九有攸同竝執玉以來庭
俱式歌而且舞遠則重譯僉議近則端笏叅謀欣覩
增天之高願逢加地之厚絕域忘生而越險華髮忍
死而爭趨中外之心克諧愚智之情允睦掌故事者
草登封而待期執羈勒者儼車徒而俟命庶官率職
三事夙興遠邇昌言明靈幽贊莫不傾視俯聽希陪
肆觀之禮效祉呈祥欽承告成之慶山稱萬歲企和
鑾而發奇雲浮五彩佇華蓋而交蔭兩儀之情轉迫

萬國之望愈深臣又聞之屈已從衆至人所以稱仁
絲言顯發哲王以之敷信昨奉明詔許以試之實降
皇情俯同人欲寬仁之利斯博示信之道宐弘即日
庶尹馳心咸奉章而守闕列藩翹足各伏地以祈恩
所冀天慈深加昭察制可羣僚之奏尅以發軫之期
頒示普天申明絕典使夫一時之士欣獨高於萬代
八荒之會荷周露於再造則臣等死日猶生之年不
任誠懇之至謹與連率方拔等奉表詣闕固請以聞
於是下詔曰自古明王君臨區宇功濟天下道被生
民內外無虞年穀豐稔莫不歸功上玄致禮厚地騰

茂實於六合飛英聲於百代今公卿在列屢屬虛心
嶽牧具僚固陳僉願理在難奪敬依來請顧循諸已
仍懷慙德

十五年三月庚辰肅州言所部川原遍生芝草先是
百僚及雍州父老詣朝堂上表請封禪四月辛卯朔
下詔曰肇有蒸庶樹之司牧載籍所紀風烈猶存至
於道洽品物功成宇縣天眷彰於符瑞人事表於隆
平莫不增封岱宗廣禪梁甫榮鏡六合對越三神前
聖所以垂其尊名後王所以仰其休烈蓋繇此也自
火德旣衰三光分裂金行失御九鼎沉淪諸華競逐

彝倫大壞雖周室削平趙魏隋氏混一文軌而金革之事未戢於封疆雅頌之音弗聞于朝廷遂使至教闕如淳風莫反齊郊絕類帝之禮日觀缺升中之儀其已久矣朕丕膺景命嗣守洪基承大亂之餘當率土之責負辰興惕納隍在慮上憑宗社之靈下資士庶之力草昧伊始援干戈以靖亂區夏既平引禮樂以緯俗尉候無警菑畲有年比屋咸保其歡含氣不違其性殊方異域盡地界而來庭應圖合牒殫天符而表瑞緬懷前載詳求諸已豈伊寡德能致此乎固乃上玄所叶贊也而羣公卿士百辟庶僚固陳人祇

之意請遵封禪之典推而不居至於數四文武之情彌切內外之議日聞誠請頻繁淹歷年載朕繼跡百王因心萬物上奉蒼昊義在薦功下撫黎元方祈厚福既迫茲理敢不祇從猥以眇身齊美上代永言夙志凜乎增惕可以來年二月有事泰山所司宜與公卿并諸儒士及朝臣有學業者詳定其儀博考聖賢之旨以允古今之中務盡誠敬稱朕意焉於是詔太常卿韋挺爲簡較封禪大使禮部侍郎令狐德棻副焉朝廷參議其儀異端競起秘書少監顏師古乃奏稱臣撰定封禪之禮書在十一年春于時諸儒參詳

以爲適中詔公卿定其可否多從師古之禮六月己酉有星孛于太微宮犯卽位辛亥朝散大夫行起居郎褚遂良進曰陛下撥亂反正功超前烈告成升嶽天下幸甚而行至雒陽彗星輒見此或有所未允合者也且漢武優柔數年始行岱禮臣愚伏願詳擇丙辰詔曰自古皇王受天之命建顯號於封禪揚洪名於竹帛者莫不功濟夷夏道叶人祇然後登泰山之高刊梁甫之石未有七德靡記九部寂寥而欲齊聲於聖哲垂美於篆籀者也朕承宗廟之重當區宇之責寅畏三靈憂勤萬姓雖戡翦禍亂克定遐荒而至

教猶鬱刑典未厝勝殘之化未洽於率土和平之風多慙於往烈是以覽經籍而自失想壇場而增懼亟寢縉紳之奏屢拒公卿之請逡巡大典荏苒歷載近者文武百僚州縣庶尹頻繁抗表殷勤固陳咸以爲兩儀交泰四夷賓服禮讓興行年穀豐稔蒼昊呈符於上靈符不可以久替黎獻協心於下衆欲不可以固拒朕迫茲羣議敢不敬從欲薦功上玄大報后土升中之儀已具省方之期有日今太史奏有彗星出於西方朕撫躬自省深以戰慄良繇功業之被六合猶有未著德化之覃八表尚多所闕遂使神祇垂祐

警戒昭然朕畏天之威寢興靡措且曠代盛典禮數非一行途之間勞費不少冬夏凋弊多未克復將送儀仗轉運糧儲雖存節省之義終煩黎庶之力非唯上虧天意亦恐下失人心解而更張抑有故實前以來年二月有事太山宜停庶夙夜自脩遂其罪已之志勤恤所解申其約誓之情儻蒙靈祇迴睠宗社介福朝廷同於大道風俗歸於朴素告成之美更思其宜仍命所司泰山有前代帝王因封禪立碑及石函檢之類往遭離亂被賊毀發竝脩立瘞藏之

二十年十一月司徒長孫無忌與百官及方嶽等上表請封禪不許司徒長孫無忌與百僚又請封禪詔曰朕念遠役初寧頗須休息深知所請甚合機宜卽事省方恐生勞擾俟百姓閑逸可徐議之十二月己丑司徒長孫無忌等又詣順天門抗表請封禪曰臣聞陰陽不測陶冶生靈之謂神道德玄通仁育黎元之謂聖聖也者自天之攸縱也神也者代天之理物也是以惟天稱辟靈心作其會昌惟辟奉天至誠表其封禪升中之道抑斯之謂歟繇是先王急焉當仁不讓景中必禋時至則行務在告於成功故無俟於終日伏見綸旨辭遠役之初寧緩此嘉期託俟人之

逸豫豈容前歌拔拒戢武之後辭勞拓境開疆太平
之秋有勸誠如睿慮未昭百姓之心假此空言實乖
千里之應臣等伏膺麟閣縱觀太始之初沉研鳥文
歷選櫓巢之上悠悠栗陸未辨犧牲森森大庭孰知
罇俎袞衣爲飾尙報太帝之功茹毛充薦輕展介丘
之禮西敘窮乎積石東漸迫乎滄江化未覃於九夷
貢有闕於三脊猶且範圍天地幹運義舒揚翠旌於
奉高撫朱紘於代嶽迓百神而賓上帝契三靈而謁
大壇玉牘靈文飛英華於萬古金繩秘檢騰清輝於
八埏是知紀號垂名崇高莫加於肆類推功輯瑞廣

厚莫大於登封若乃靈貺所集人謀允洽雖固執於
撝謙諒無得而辭也伏惟皇帝陛下研精探賾神無
不昭唯幾所鑒洞出象帝之初先天成則超貫混元
之際繇是大明揚彩麗雕軒以再中景宿騰輝藻璇
題以霄映奔山車而疊軫促日馭之鳴鑾躍澤馬而
相趨徵天駟之徐軻烟川清野蓄洩於奕奕之阿薰
風警途扇蕩於云云之嶠其冥兆也如彼其顯應也
若斯而陛下因事逡巡方稽大典使尊名顯號韜光
於琰碑絕異殊尤沮絢於瓊簡孰謂畏天之命順人
之欲者歟率土悽悽深所未喻臣又聞之游海若者

馮夷之宮爲陋登太山者魯侯之邦蓋小是知絳霄
不極九垓網絡於胷中赤縣無涯四海括囊於度內
何者升山巢睫竊比所以懸殊朝菌靈椿長短自然
相度也若夫大樂云替封豨盜鍾大禮旣湮長鯨裂
冕而撫石於無體均天之響鬱興採掃地於無形禮
宗之道逾劭則女希慙其創制軒后歸其正名矣至
若比屋見誅農夫化爲京觀稟噉無類芻牧窮於染
鏹重與粒食頌栖畝之餘糧首建驂駟詠徒行之兼
乘則農皇貶於推轂義氏退以扶輪矣旣而凝旒闡
化中外禔福負辰勝殘飛沉遂性亭育侔於宇宙就

望體於雲日荷其德以難名用其功而無謝故乃遷
高辛之順義孕顓頊之疏通矣加以刑清政肅委金
科而罔施毀犴空囹設畫衣而莫犯通關梁於夏服
共苑園於黎蒸擊壤而謠傳清音於戎狄耕田而食
建可封於阜隸外戶設而不禱神獸馴而靡觸故以
光融伊帝景煥虞庭至於卑宮菲膳孝享通於鬼神
大路越席致敬極於嚴配黃屋建三辰之旂垂範裕
於千祀玄舄垂九旒之藻設法懸於萬代小正調其
玉燭應祥冥而不虧中天朗其金鏡與真明而同晷
則文命以是伏膺玄王於茲負笈矣泊乎翦商除害

夷項墜災戮冀野而復皇猷誅疇華而清帝道提倚天之長劍拯塗炭於遊魂揮駐日之雕戈暢懷生於仁壽則駭文武之仍代吞高光之累葉矣詮彼數君時聞一善能兼之者實歸仁聖若乃提封海外總一寰中日域窮芳華之津月竈跨濛波之表顛顛面內竝爲冠帶之倫飄飄駕風總萃王庭之會賁北荒之明月初天府以摘光筐南州之火毛嚮旗亭而吐曜龍伯釣鼈之旅咸編列於武臣鳳洲君子之渠各委質於文吏斯乃書契之所未覩超古先而絕類矣竊惟域中三大義均一體感通繇乎影響彌綸切乎交

際是知德逾厚者貺逾深功尤高者祥尤著當今俾窮儲祉浹天紘以宅心后土錫符總坤維而服化繇是百官累息萬國聳神僉發叩閭之請佇副上靈之望伏願時紆睿綬遠振天聲徵鴻儒聘鯢齒考逸義緝遺編撫秦燬之逸文採魯壁之餘蠹酌雲經而定議憲河圖而繕儀然後玉路乘春金鑣肅景五牛翻其折羽六龍輝其鏤錫鼓豐隆而警翠微振列缺而清綠野疑筵發岫合萬歲於山言飛蓋登巒錯五松於林秀登園壇而接武降曜魄而齊尊俾夫一代衣冠寘其名於冊府四方夷狄鑿其竅於靈宮則普天

欣賴懷生再造朝聞夕死抃若登仙臣等深荷玉成
不勝至願重竭愚瞽昧死以聞詔曰朕遐觀哲王煥
在方冊功既成矣咸禮備以升中道既行焉必奉符
而告禪所以發揮天命昭報上靈其有建顯號以創
鴻徽施尊名而騰茂烈者莫不揚輝於鏤玉絢景於
塗金昭昭然麗三辰而竝運滔滔焉播四冥而極深
朕誠寡德良深景慕曩者氓俗凋弊國步甫安勉致
隆平日不暇給而槐卿守闕請繼美於云亭嶽牧叩
閭祈踵武於梁岱自惟菲薄至道未凝抗禮皞穹實
懷疑懼緇尋幼齒運鍾交喪忘共家以徇天下委其

體以濟寰中翊戴先皇則平諸夏出於萬死首尊五
橫之源不顧一生光錫兆人之命越自鑑炭獲逐營
魂拔於鬼錄竝登仁壽竊惟天地之大德存於施生
朕以徑寸之懷小心襲於造育降期體泰諒或繇茲
不然者何能致於此也遂得池隍象浦苑囿龍沙置
一侯於鶴林同六爻於鯀水實資天睠賁以咸亨豈
朕徽庸而能及此今茲列辟卿士鴻生碩德各迷靈
徵累陳丹款既迫羣議當事敬從乃詔有司廣召縉
紳先生議方石園壇之制草封禪射牛之禮脩造羽
儀輦輅竝送之維陽宮

二十一年正月丁酉詔曰朕聞天高地大首播黎方
媯皇燧人肇恭玄籙是知施生爲德處崇高而不言
亭毒攸資委欽明以司契洎乎三正迭建五運相遷
休烈存乎典墳至道流乎雅頌其有仰齊七政俯會
百神察靈眷於祥符報玄功於昭告莫不罄情梁岱
繼踵云亭對越兩儀盡先聖之能事揚黜三統垂曩
哲之尊名懸鏡天衢罔不繇於此也自中陽絕組堙
白水於窮流宮孽紹興阻黃星於天塹永嘉束播化
金馬以爲牛道武南徂飛蒼鵝以登祚周吞嶽喬逮
二葉而巢傾隋并舜後及二帝而舟覆莫不以凶易

亂以暴代昏各肆巨壑之心規享上靈之佑却行求
進其可得乎繇是寂寥千祀無懷之風不嗣泯棄七
經子長之言殆絕遂使成山日觀久闕升中之儀汶
上明堂疇聞類帝之義顧瞻禮樂深有可差朕幼踐
危機愍斯窮運上同負翼下靡息肩負荷休徵投旗
鞠旅肅恭儲祉吟雲躍鱗順朱鳥以行誅騫丹鳳而
遐舉射九鳥而懸日月區品物以煦陽和練五石以
造乾坤濟摧角以全眉壽於是尊奉先帝凝旒於廟
堂躬履兵鋒憂勤於燹輔旣而仰逼威命俯順樂推
越自唐侯言膺下武深惟憂責之重自勗若厲之懷

遂致靈貺無涯翦毛頭而降錫遊魂削衽盡窮髮以
開疆東苑蟠桃西池昧谷咸覃正朔竝充和氣較凝
禎於往代窮今古而罕聞考光澤於前皇罄練細而
莫覩豈朕眇身勤勞所逮諒繇高明垂鑒祚此隆平
今茲三事大夫百僚庶尹各迷天人之意請躡封禪
之蹤顧惟寡薄推而不有杜絕羣言至于數四中外
之情尤切企佇之望逾深朕又詳思荷財成於穹昊
自古賢哲竝歸功於大帝追斯至理弗獲固辭展禮
上玄實增慙懼可以貞觀二十有二載仲春之月式
遵故實有事於太山諸內外具僚嶽牧卿士既相敦

諭將事告成各罄乃心無虧政道恪居職務以協時
筮所司宐與縉紳先生載筆圓冠之士詳求通典裁
其折中深加嚴敬稱朕意焉乃令天下諸州明揚仄
陋其有學藝優洽文蔚翰林政術甄明才膺國器者
竝宐摠集太山庶令作賦擲金不韞天庭之揆被褐
懷玉無溺屠釣之間務得英奇當加不次也遣太嘗
卿楊師道爲簡較封禪大使戶部侍郎盧承慶爲副
後改令禮部尚書江夏郡王道宗爲大使司空梁國
公房玄齡等議云梁甫社首二山竝是古昔禪祭之
所去十五年議奏請禪梁甫今更奉詔詳議梁甫去

泰山七十里又在東南至於行事未爲穩便社首去
泰山五里是周家禪處臣等叅詳請禪社首有詔依
奏餘竝依十五年議八月壬戌詔曰朕聞探玄曠者
先實而後賓體至公者本仁而未禮名歸於已往哲
存而弗務德利於人前聖徇而爲急是用範圍天地
權輕重以會時宜取則陰陽適通變以從衆欲繇古
之封禪無奪事機所謂奉天咸資務際朕仰窺前志
歷選哲王無懷有巢緬逾繩契之末龜文鳳紀越在
俎豆之先扣寂寞以傳疑故可略而言也至如三元
立統百物正名步驟之軌非遙損益之源可挹雖堯

心廣運局疆域於流沙禹跡遐宣隈隩封於碣石猶
且先引卽敘次展玉帛之儀首創賓門方備云亭之
典告成之義罔弗繇茲况朕奄有方輿闡域該於千
古仰承靈睭降福超於百王巨海所環莫非臣妾長
河攸括竝入封疆日者夷夏同文禎符狎至謂可鳴
鑾日觀勒牒仙閣許以來春親行告禪而今延陞一
姓流竄西陲控弦萬計初歸正朔新就繫維又以公
卿庶僚各陳誠請遂有翠微之役非無板築之勞旣
而山谷阻深朝宗有礙重披丹懇請建玉華且復頻
有興造恐致勞煩兼聞河北數州頗傷淹溺朕爲人

父母思濟黎元順動升中理無兼遂其介丘之禮宜
且權停其玉華宮制度務從菲薄更令卑陋庶免風
雨稱朕意焉

